

Uunga siunnersuut: Atuarfik pillugu Inatsisartut inatsisaata allanngortinneqarnera pillugu Inatsisartut inatsisaat
(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Saqqummiussissut

Siullermeerneqarnera

Ilinniartitaanermi aaqqissuussinernik ingerlaavartumik pitsanngorsaasarnissanik pisariaqartitsisoqarpoq, taamalu aamma meeqqat atuarfianni pitsaassusissanik annertunerulersitsisarnissamik. Tamanna pisinnaavoq suliniutit arlaqartut aqqtigalugit, ilaatigut ilaasortanit siunnersuutit sammineqartarneranni aamma oqallisigineqartarsimasut. Siunnersuut una siunertaqarpoq inatsisitigut tunngavissanik pisariaqartunik pilersitsisoqarnissaanik, suliniutit ilaasa piviusunngortinneqartarnissaat qularnaarumallugu.

Siunnersuut tamanna tunngavigalugu imaqarpoq aalajangersakkanik atuarfimmi inuttut attaveqaqatigiittarnermut, digitaliusumik ilikkagassalerisarnermik aamma atuarfinni pisortat ilinniartitaanerannut tunngasunik.

Meeqqat atuarfiini inuttut attaveqaqatigiittarneq pillugu aalajangersakkat tunngaveqarput meeqqat atugarissaarnissaasa salliutinneqarnissaanik kissaateqarnermik, tamatumani ilaallutik meeraanermi toqqissimasumik aaqqissuullugaasumillu atugassaqartitsisoqarnissaa, - aamma meeqqat atuarfianni. Tamatumunngalu atatillugu atuartut periarfissaqassapput ajornartorsiuteqarsimagunik ajornartorsiutimi oqaluserineqartarnissaanut, ikiorserneqartassallutillu aamma ajornartorsiutini atuarfimmuut toqqaannartumik attuumassuteqanngitsut aaqqiissutissarsiniarneranni.

Atuarfiit pisortaasa piginnaanngorsaqqinneranut/ilinniaqqinneranut siunertaavoq atuarfinni ingerlatsinerup nukittorsarneqarnissaa, atuarfinni unammilligassat naapigiarneqartarnissaat siunertaralugu. Tamatumani ilaapput soqutigisaqartunut assigiinngitsunut attaveqarneq, - atuartunut, angajoqqaanut, ilinniartitsisunut, naalakkersuineramik suliaqartunut, atorfilinnut aamma inuussutissarsiortunut. Pisortaasut piginnaanngorsaqqinneranut/ilinniaqqinneranut ilutigisaanik sulisuusut akornanni atugarissaarnerunermut aqqtissiuussissaaq, allaffissornikkullu ingerlatsinermi pisunik takunnissinnaanerunermut aqqtissiuusseqataassalluni, nukinnik suliassanut assigiinngitsunut toqqaannartumik atuartitsinerunngitsunut aamma atugassaqartitsinerulertussamik. Tamatumani pineqarput piginnaanertigut qaffasinnerusumik inissisimalernissaaq, soqutigisaqartunut tamanit kissaatigineqartutut.

Kiisalu siunnersuut aamma imaqarpoq aalajangersakkamik periarfissaqartitsilersussamik klassimi atuartut amerlassusissaasa aqunneqarsinnaanissaanik. Kiisalu aamma siunnersuut

imaqarpoq aalajangersakkanik digitaliusumik paasinninnerup akuutinneqarnissaanut, aamma digitaliusumik “angalaartarnerup” nammineq fagitut ilikkagassatut atorineqarnissaanik.

Taaneqareersullu saniatigut siunnersuut aamma aalajangersakkanik imaqarpoq meeqqat atuarfiat pillugu Inatsisartut inatsisaata allanngortinneqarnissaanut UKA 2017-imi siunnersuutikkut 2017/100 saqqummiunneqartunik. Tassani pineqarput aalajangersakkat taamani siunnersuutaasumit tunuartinneqartut, innersuutigalugu taakkua kingusinnerusukkut nalilersuinernik utaqqisinneqartariaqarnerannik. Tamatumani pineqarput oqaluttuarisaanerup fagitut immikkoortutut inissisimalernissaa aammalu najukkani namminerni faginik toqqaasinnerup aqunneqarnera.

Taamatut oqaaseqarluni siunnersuut Inatsisartunut suliassiissutigaa.